

Regional News Unit AIR Aizawl
Wednesday, July 24, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Leilet neitute buhhum thar chhuah leisak kawnga hmalakna 'Paddy Procurement Programme' chungchanga inhrilhhriatna hun Agriculture and Farmers Welfare Department in a buatsaih.
- National Highway No.102 B Keifang leh Tuivawl inkar kawng ko nasa taka min avangin lirthei eng chi mah kaltlang theih a ni rih lo.
- Nimina Lok Sabha-a Union Budget 2024-25 pharhah thingtlang tihhmasawn nan sawrkarin cheng vaibelchhe nuai 2.66 a dah.
- Ethiopia-ah leimin nasa tak avangin mi 155 an thi tawh.

<><><>

AGRI

Leilet neitute buhhum thar chhuah leisak kawnga hmalakna 'Paddy Procurement Programme' chungchanga pawimawhte inhrilhhriatna hun Agriculture and Farmers Welfare Department chuan vawiin khan an buatsaih a,

Aizawl Agriculture Conference Hall-a he hun hmannaah hian Agriculture and Farmers Welfare Minister Pu PC Vanlalruata chuan Mizoram Sawrkarin tunhnaiah Chief Minister kaihhruai 'The Mizoram State Government Paddy and Rice Procurement Committee' a din tih sawiin, hemi hnuai din Task Force-in loneitu atangin buhhum leh buhfai leisak theih a ni em tih a zirchiang dawn a, Sawrkarin support price siamin thlai pali lei tura ruahmanna a kalpui thu sawiin, hemi bakah hian buhhum lei turin zirchianna kalpui mek a nih thu a sawi.

He hun hi Aizawl tlang atanga Kolasib leh Mamit District chhunga leilet neitute tana tih bik a nih rualin Kolasib leh Mamit District chhung khaw hrang hranga sensitization programme lo kalpui tawh khaikhawmna a ni nghal baw k a. Leilet neitute chu buh ching uar tur leh hralh chhuah tham nei tura tan la tura chah niin, ram leilung fate ngeiin a hlawkna an tel ngei theih nana hmalak a tulzia hrilhhriat an ni a. Loneitute atanga buhhum lei leh Public Distribution System (PDS) nena thlunzawm turin Minimum Support Price (MSP) siam a tul bakah loneitute leh Line Department-te nena tanrual tlan a pawimawh thu tarlan a ni.

Agriculture and Farmers Welfare Department chuan Kolasib leh Mamit District-ah kumina leilet buh chinna hmun hactare 1280 a zau survey a neih atangin buhhum quintal 27194 thar chhuak turin a beisei a. District pahnihah hian buh chinna leilet zau (WRC cluster) 121 awmin leilet neitu 2252 lai awma chhut a ni a. Kum 2017-2018 ah khan Agriculture and Farmers Welfare Department chuan Special Programme for Establishment of Mini-Rice Mill chu State danga buh hralh a nih loh nan leh leilet neitute hamthatna turin a lo kalpui tawh a.

Paddy Procurement Programme hlawhtlinna tur hian kumin July thla tir khan Mamit leh Kolasib District khaw hrang hrangahte Paddy Procurement Sensitization Drive kalpui niin Department hotute kaihhruaina hnuaiah Officer thahnem takin sawrkarin buh tharchhuah man man zawka a lei tur chungchang inhrilhhriatna leh sawihona hun hman a lo ni tawh bawk.

<><><>

CM

Chief Minister Pu Lalduhoma'n, Information Technology chu khawvel huapa sorkar kalphung leh inrelbawl dan tidanglamtu a ni, a ti.

He thu hi Information & Communication Technology Dept. huaihawt, Mizoram Assembly Annexe Hall-a Government Online Excellence Award semna hun nimina neih-ah sawiin Chief Minister chuan, Mizoram sorkar hnuaiia inrelbawlina kawngah Information Technology hman a nih avangin kawng tam takin hna a awlsam phah bakah sorkar leh mipui inkarah pawh rah tha a chhuah a ni, a ti a. Mihringte nitin nun hman danah pawh information technology chu hmasawna thlentu a nih thu a sawi.

ICT Minister Dr. Vanlalhlana pawhin thu sawiin, ICT-in lawmman an sèm chu, sèm satliah mai an nih loh thu leh sorkar inrelbawlina atana thil pawimawh tak a nih thu a sawi a. Mizoram sorkar hnuaiia department hrang hrangte pawhin internet kaltlanga hna thawh an thiam zual zel theih nan theihtawpa tan an lak zual sauh sauh a ngai a, zirna in leh department dangte pawhin hmasawn zelna atan tunlai thiamna an hman a pawimawh, a ti.

ICT Minister chuan Mizoram sorkar hnuaiia Department zingah website nei si, enkawl mumal lo an awm thin chu a that loh thu sawiin, mipui ten an chhawr theih tur atana website kaltlanga department hmalakna kawngah tan an lak zual sauh sauh a ngai, a ti.

He huna tel Chief Secretary Dr. Renu Sharma chuan sawrkar inrelbawlina Information Technology-in a tum ber chu mipuite tana awlsamna thlen a ni, a ti a. Rorelna langtlang leh felfai a awm theihna atan Information Technology chu hmanraw tha tak a nih thu a sawi.

<><><>

RUIHHLO DO MONITORING APP

Social Welfare and Tribal Affairs Chief Executive Officer Pi Lalhlupuii Sailo chuan nimin khan Ruihhlo Do kawnga hmalakna internet vanga vilna tur application, epi.info a hawng a, Ruihhlo Do chungchanga inelna Video/Reels Competition lawmman sem a ni bawk.

SAD Conference Hall MINECO Aizawl-ah he hun hi hman a ni a, Pi Lalhlupuii Sailo chuan application tlangzarh tak chu ramchhunga a hmasa ber a nih thu leh statistical information a nih tel thu a sawi a, tun dinhmunah zirlai sikul kal mek zingah pawh ruihhlo ti an pun nasat thu a sawi.

He hun hmanpuitu Social Welfare, Tribal Affairs, Women & Child Development Department Commissioner Pi Lalzarmawii pawhin thusawiin zirlaite chu Ruihhlo Do kawnga an thiamna neihte hmang chhunzawm zel turin a sawm a, thalaiten Social Media an hman nasat thu a sawi bakah Ruihhlo do kawnga Video Reel Siam chuan Mizo thalaite zingah awmzia a nei hle a ni, a ti.

Pi Lalzarmawii chuan kalkhawmte chu Ruihhlo do kawnga tha thlah lova bei zel turin a sawm bawk.

He hunah hian Excise and Narcotics Department Joint Commissioner Pu Peter Zohmingthanga pawhin thusawiin zirlaiten lemchan tawi, video reel hlawhtling taka an siamna phenah an zirtirtute leh an chhungte an inphum ruk thu sawiin Media platform-a pho lan tlak video zirlaiten an siam chu thil lawmawm tak a nih thu a sawi bawk.



SAITUAL

Nimin khan National Highway No.102 B Keifang leh Tuivawl inkar, Keifang atanga Km 8 vela hla kawng ko chu nasa takin a min a, chanchin buatsaih lai thleng hi chuan lirthei eng chi mah kaltlang theih a ni lo.

Kan corr Rammawizuala sawi danin, helai leimin hi lung khawkrawk hmun niin chawhnu 1:00pm hnu lamah pawh a khat tawkin lung a tla reng a, mihring tan pawh kal kai mai a him loh avangin lirthei leh kea kal tangkhang an thahnem hle.

Loh theih lova Champhai tlangdung atanga Aizawl pan ngaite chu Kawlkulhah let chho lehin Saichal lam atanga hel an awm nual a, helai kawng pawh hi ruah a sur chuan kal tlang harsa khawpin a chhe tho a ni.

Leiminna bulah hian company mi leh sa hnathawkte pawh khawl nen inchhawp mahse a leilung enin then fai mai ngam a nih hrih loh avangin lei tlakna bulah hian inring sain an awm a, lei tawlh hi a nasat avangin khawl ringawt chuan thenfai theih a ni dawn lova, lung halna rawih a ngaih tur thu hnathwktute chuan an sawi a, khuain a thim hnan chuan zan lamah thawh theih a nih dawn loh avangin leimin hian zanin zankhua a awh rin a ni.

Kan corr sawi danin, tunlai hian Ngopa leh Tuivawl inkar kawng chhe lutuk avangin Ngopa tlangdung khaw hrang hrang mipuite an mangang hle a. Ngopa tlangdung kawng hi National Highway No.6 Manipur State pawh tura NHIDCL hnuai Contractor ten an laih mek a ni a, khuarel chhiatna te, kawng laih vanga chhe satlah chu hriatthiam theih a nih rualin tun dinhmuna kawng chhiat dan erawh, hnathawktu Company lamte inthlahdah vanga thleng hi a tam zawk a nih ngei an rin thu leh, helai tlangdung mipuite inzahlohna lian taka an ngaih thu Pu Lalropuia Chiahpui VCP chuan a sawi a, thuneitu lamten a rang lama hma lakpui se an duh thu a sawi bawk.

Kawng chhiat lutuk avang hian helai tlangdung mipuite chuan harsatna an tawk nasa tawh tih sawiin, Maxi Cab Service pawh kal ngam lovin an chawlh chang a awm fo a, khawtlang pawimawh Office dawr leh chhungkaw pawimawha te, zirlaite tan duh hunah zin chhuah a theih loh niin an sawi. Lirthei loh theih lova an kal chang pawhin kawng chhe karah riah inring saa kal a ngaih thu te, a bik takin damlohna thila zin veivah a ngaih changin a manganthlak zual niin an sawi bawk.

Motor lian, nitin chakkhai phurte chu Excavator nen vil zui a ngai a, Km 1 kal turin an tihfuh loh tum chuan nilenga hun hman a ngaih chang a awm niin an sawi.

Hemi chungchang hi Saitual District VC Association chuan NHIDCL-ah vawi tam an thlen tawh thu leh Tuivawl-Saitual inkar phei chu Contractor thlan an awm lova, a khawihthu tur ni lo, Sersing Company chuan a chhe zual an va hmui chauh thin niin an sawi.



UNION BUDGET

Nimina Lok Sabha-a Union Budget 2024-25 pharhah thingtlang tihhmasawn nan sawrkarin cheng vaibelchhe nuai 2.66 a dah. Heng bakah hian tribal te nitin khawsak phung chawikang turin kawng hrang hranga hmalak a ni dawn bawk a. Union Finance Minister chuan North East bikah India Post Payment Bankd 100 chuang din thar a nih tur thu a sawi a. Hei hian hmarchhak mipuite tan banking service a ti changtlung dawn a ni a ti.

Kumin budget ah hian Agriculture leh a kaihhnawih eizawna atan cheng vaibelchhe nuai 1 sing 5 leh sang 2 dah a ni a. Kum 2 lo awm tur chhungin loneitu vaibelchhe khat chuang chu natural farming tih tir an ni ang a ti a. Hei bakah hian Cooperative sector hmasawna turin sawrkarin National Cooperation Policy a duang a ti bawk.

<><><>

CONGRESS

Congress Party chuan nimina Union Budget 2024-25 chu sawiselin mi naran tana chhenfakawm thil engmah a awm lo an ti. Congress hruaitu Rahul Gandhi chuan tun budget chuan BJP leh a thawhpuite a duhsak bik hle niin a sawi a.

President Mallikarjun Kharge pawhin rampumah thil man sang avanga mipui an buai mek laiin a tihhnamna tura hmalakna engmah puan a ni lo a ti a. Sawrkar chu Congress in thalaite tana scheme a ruahman entawnah leh a hming thlakah a puh bawk a ni.

<><><>

ETHIOPIA LANDSLIDE

Ethiopia-ah leimin nasa tak avangin mi 155 an thi tawh. State media sawidanin Thawhtanni zing khan Geze Gofa district chhimlamah leimin hi a thleng a. Tualchhung thuneitute chuan a tirah ruang 55 an hmuchhuak a, an zingah hian hmeichhia leh naupang an tel a. Chhanchhuah hna thawh mek niin mitthi zat hi an pung zel a. Ethiopia ah hian fur ruahsur hi July atangin a tla tan a, September thla laihawl thlengin a a sur a. Hetianga ruahsur chhum lo chat lo avang hian hmun tam takah leimin a thlen phah thin a ni.

<><><>